

ՎԱՍՏԱԿԱՎՈՐ ՀՆԱԳԵՏ-ՊԱՏՄԱՐԱՆԸ
(Ս. Գ. Բարխուդարյանի ծննդյան 75-ամյակի առթիվ)

Հ. Գ. ԹՈՒՄՅԱՆ

Արդի հայագիտության երախտավորներից է Սեդրակ Բարխուդարյանը, նրա գիտական աշխատանքները ստեղծվել են ավելի քան չորս տասնյակ տարիների ընթացքում և ընդգրկում են հնագիտության ու վիճական արձանագրությունների մի շարք կարևոր հարցեր:

Բարխուդարյանը ծնվել է 1898 թ. Պարսկաստանի Սալմաստ գավառի Հավթվան գյուղում, աշխատավոր գյուղացու ընտանիքում: Նա ավարտել է գյուղի տարրական դպրոցը և հիմնավոր կրթություն ստանալու բուռն ցանկությամբ, պատանի հասակում, իր հոր ընկերոջ ուղեկցությամբ մեկնում է Հեհաստան: Բայց այնտեղ երկար չի մնում: Երբ Բարխուդարյանների ընտանիքը Պարսկաստանից տեղափոխվում է Թիֆլիս, Սեդրակը Կրակովից գալիս է ծնողների մոտ: Կրթություն ստանալու ձգտումը նրան սկզբում իրադրոժել չի հաջողվում: Թիֆլիս տեղափոխված ընտանիքին օգնելու անհրաժեշտությունը ստիպում է Բարխուդարյանին սովորել քաղաքում ամենատարածված արհեստը՝ կոշկակարություն: Նա սիրում էր կարգալ և ձեռքից ցած չէր դնում գիրքը անգամ արհեստով զբաղված ժամանակ: Միայն 1924 թ. նրան հաջողվում է էքստերն կարգով ավարտել Ներսիսյան դպրոցը: Նույն տարում նա գալիս է Երևան, ընդունվում համալսարանի պատմագրական ֆակուլտետը:

Տակավին ուսանողության տարիներին Բարխուդարյանը աչքի էր ընկնում Հայաստանի և ընդհանրապես Անդրկովկասի հնագիտության կյանքի պատմության իմացությամբ, հետաքրքրվում էր նյութական մշակույթի հուշարձանների ուսումնասիրության հարցերով: Նա իր շուրջն էր համախմբում ֆակուլտետի ուսանողներին, կազմակերպում հայագիտական և հնագիտական հարցերի ուսումնասիրության գիտական խմբակներ: Համալսարանը հաջողությամբ ավարտելուց հետո Ս. Բարխուդարյանը 1928 և 1929 թթ. ուսուցչի պաշտոն է վարում Նոր Բայազետի մանկավարժական տեխնիկումում: Այդ տարիներին նրա ուշադրությունը գրավում են Նոր Բայազետի շրջանի հնագիտության մշակույթի հարուստ մնացորդները: Նա տեխնիկումի աշակերտների հետ շրջապատում է գյուղերում, կազմում շրջանի հնագիտական քարտեզ:

Տարիներ անց Բարխուդարյանը ձեռնարկում է ուսումնասիրելու Սևանա լճի ավազանում նախաուրարտական ժամանակաշրջանում բնակված տոհմացեղային խմբերից մեկի բնակավայրը՝ Վելիքուխին, որը բեկնադիր արձանագրությունների տվյալներով զբաղեցնում էր հենց այն տարածքը, որի հնագիտական քարտեզը երիտասարդ գիտնականը կազմել էր դեռևս Նոր Բայազետում ուսուցչական պաշտոն վարելու ժամանակ: «Վելիքուխի երկիրը» խորադրով իր ուսումնասիրությունը շարադրելիս նա օգտագործել է ոչ միայն ուրարտական արձանագրությունները, այլև գլխավորապես այն հա-

րուստ նյութական կուլտուրայի մնացորդները, որոնք հայտնաբերվել էին պեղումների ժամանակ Նոր Բայազետ քաղաքի մոտակայքում և նրա շրջանում:

Իր աշխատության սկզբում հեղինակը քննադատում է պատմական երկերի մեջ գործածվող «նախապատմական» տերմինը, գտնելով, որ այն հնացած է, որ շատ տեղերում հայտնաբերված են մինչ այդ անծանոթ զբավուհ հիշատակարաններ, որոնք լույս են սփռում «նախապատմական» կամ «անգիր» ժողովուրդների պատմության վրա: Մեր թվականությունից առաջ, ասում է նա, X դարից մինչև VI դարը Հայաստանի պատմության մեջ համարվում էր «անհայտ», «անորոշ», «նախապատմական» մի ժամանակաշրջան: Բայց XIX դարում հայտնաբերված խալդական սեպագիր արձանագրությունները «ի հայտ բերին մի ամբողջ նոր աշխարհ՝ խալդ-ուրարտական ժողովուրդներին»: «Նախապատմական» կոչված դարաշրջանների հասարակական ֆորմացիաների պատմության լուսաբանմանը, Բարխուդարյանի կարծիքով, մեծապես նպաստում է հնագիտությունը՝ նյութական մշակույթի պատմությունը (հուշարձաններ, զենքեր, զարդեր, խեցեղեն, տնային պաշտամունքի իրեր և այլն):

Հենվելով պատմագիտության մարքսիստական տեսության վրա՝ հեղինակը «Վելիբուխի» տոհմատիրական-ցեղային ժամանակաշրջանը համարում է նախադասակարգային: Վելիբուխի հասարակական կազմը նա նմանեցնում է էնգելսի նկարագրած իրոկեզների կամ հույների տոհմա-ցեղային կազմակերպության: Պեղումներից ստացված նյութական մշակույթի մնացորդների ուսումնասիրությունը, ըստ Բարխուդարյանի, ցույց է տալիս, որ այն պատկանում էր բրոնզի դարին և երկաթի դարի սկզբնավորության շրջանին: Կլիմայական նպաստավոր պայմանները հնարավորություն էին տալիս տոհմերին պարապելու անասնաբազմությանը և հողագործությանը: Բավական զարգացած էր կավագործությունը: Մի տոհմի ուժերից վեր կառուցվածքների գոյությունը «Բերդ-շեներում» ցույց է տալիս, որ տոհմերի միջև զարգացած էր համայնական աշխատակցությունը: Երկրի տերիտորիան ծածկված է եղել անտառներով, որոնք այժմ չկան: Վելիբուխի անվանումից է ծագում հայկական Գեղարքունի տեղանունը (վել-գել-գեղ արմատից):

Նշված ուսումնասիրությունը զեկուցված է Կուլտուրայի պատմության ինստիտուտի պատմական սեկցիայի հատուկ նիստում: Աշխատանքը ստացել է բարձր գնահատական, 1933 թ. արժանացել է «Մելքոնյան» մրցանակի և տպագրված է Կուլտուրայի պատմության ինստիտուտի աշխատությունների առաջին հատորում¹:

Նույն ժողովածուում է տպագրված գիտնականի նաև «Երկու արամեանա-տառ արձանագրություն» վերնագրով² արժեքավոր հոդվածը:

Բարխուդարյանը հայ վիճական արձանագրությունների անխոչ հավաքող և հիանալի վերծանող էր: Այդ հիման վրա է կատարված նրա «Միջնադարյան հայ ճարտարապետներ և քարգործ վարպետներ» մեծարժեք աշխատությունը, որ նա պաշտպանել է իբրև թեկնածուական դիսերտացիա: Իր աշխատությունը շարադրելու համար, բացի հայ վիճական արձանագրություններից, հեղինակը մանրամասն ուսումնասիրել է մեր հարուստ հին և նոր գրականությունը:

¹ Ենյութեր հին Հայաստանի պատմության», Երևան, 1935, էջ 150—204:

² Նույն տեղում, էջ 207—214:

«Քարգործ վարպետներ» ասելով, Բարխուդարյանը հասկանում է այն բոլոր վարպետներին, որոնց ջանքերով կառուցվել են հայկական միջնադարյան քարաշեն մեծ ու փոքր հուշարձանները: Նրանց դործունեության սկիզբը, հեղինակի հավաստմամբ, ծագում է խոր հնադարում, պալեոլիթի և նեոլիթի դարաշրջաններում: Այդ բանը նա մակաբերում է վարպետների գործածած քարե դործիքներից, ստեղծած քարաշեն բնակարանների մնացորդներից, գերեզմաններից, ժայռերի վրա փորագրված մարդկանց և կենդանիների քանդակներից ու սիմվոլիկ նշաններից: Մեր «Քարգործ» վարպետները մեծ հմտության ևն հասնում հետագա դարաշրջաններում, դենքերի, քարե կացինների, քարե նետասլաքների պատրաստման գործում: Նրանց անունները ծածկված են անհայտության բողոք: Անհայտ են նաև ուրարտական պետականության ժամանակ որպես մասնագետ քարգործ վարպետ աշխատող այն տաղանդավոր արհեստավորների անունները, որոնք կառուցել են պալատներ, տաճարներ, քաղաքներ, արձաններ, բերդապարիսպներ: Հայկական պետականության ժամանակ քարգործ վարպետների ձեռքով են շինվել Արտաշատը, Տիգրանակերտը, Դվինը, Գառնին և այլն՝ իրենց պալատներով և տաճարներով:



«Քարգործ վարպետներ» ընդհանուր անվան տակ հեղինակը խմբել է միջնադարյան բոլոր հայ վարպետներին, որոնց նա բաժանում է չորս հիմնական խմբերի՝ ճարտարապետներ, քանդակազարդող վարպետներ, արձանագիր վարպետներ կամ գրիչներ և օժանդակ այլ վարպետներ (քարտաշ, որմնադիր և այլն):

Սեդրակ Բարխուդարյանի գիտա-հետազոտական ուղարկված աշխատանքներից պիտի համարել նաև «Հայ կնոջ իրավական վիճակը միջին դարերում» խորագիրը կրող հոդվածը³, որին աղբյուր են ծառայել գլխավորապես հայ վիճական արձանագրությունները, ձեռագրական հիշատակարանները և մասամբ՝ հայ կնոջ իրավական վիճակը շոշափող հին ու նոր դրավոր աղբյուրները (հիմնականում դատաստանագրքերը), ժողովրդական բանահյուսությունը: Հեղինակը իրավացիորեն արձանագրում է, որ պատմագիտական երկնքում, ուր ժողովրդի ներքին կյանքը գրեթե չի շոշափված, կանանց իրավական վիճակի մասին շատ քիչ բան է պահպանվել: Այս աշխատության մեջ հանգամանորեն ապացուցվում է, որ միջին դարերում հայ կինը օգտվել է քաղաքացիական մեծ իրավունքներից: Դատաստանագրքերում և հատկապես վիճական արձանագրություններում եղած բազմաթիվ փաստերը ապացուցում են, որ իրավական տեսակետից սկզբունքային սահմանափակում չի եղել հայ կնոջ նկատմամբ: Նա մասնակցել է բոլոր տեսակի հասարակական գործերին, դատարանի առաջ հանդես է եկել որպես լիիրավ քաղաքացի: Գրավոր և սովոր-

3 «Պատմա-բանասիրական հանդես», 1966, № 2, էջ 25—40:

րութական օրենքով հայ կիներ հավասար մաս ու բաժին է ունեցել հայրենական տան ընդհանուր ստացվածքից: Միջնադարում ժողովրդական ընտրություններ գործող երկու հիմնարկություններում՝ վանքերի հոգաբարձական կազմում և գյուղական համայնքի ավագների ժողովին հավասար իրավունքով մասնակցում էին նաև հայ կանայք: Հիմնվելով անհերքելի փաստերի վրա, հեղինակը միակողմանի, անհիմն և պատմականությունից զուրկ է համարում XIX դարի ազգագրական նյութեր հավաքողների, ինչպես նաև օտար հեղինակների մեծամասնության կարծիքները հայ կնոջ «ստրկական» վիճակի մասին:

Առանձին գրքով լույս է տեսել հնազետ-պատմաբանի մի այլ աշխատությունը, որ նա գրել է Հայաստանի հուշարձանների պահպանության կոմիտեի հանձնարարությամբ: Այն լույս է տեսել 1935 թ. «Սովետական Հայաստանի հնությունների տեսակներն ու նրանց պահպանության անհրաժեշտությունը» վերնագրով: Այդ աշխատությունը կարևոր նշանակություն ունեցավ Հայաստանի տարածքի վրա ցրված բազմաթիվ և բազմազան արժեքավոր հուշարձանների մնացորդների պահպանության գործը կազմակերպելու և ամրապնդելու համար, ընդարձակեց Սովետական Հայաստանի նյութական մշակույթի մնացորդների տեսակների մասին մինչ այդ գոյություն ունեցող սահմանափակ պատկերացման շրջանակը: Նշված գրքով ընթերցողը ծանոթանում է Հայաստանի հասարակական հին տնտեսաձևերի (նախնադարյան-համայնական հասարակություն, որն ընդգրկում է պալեոլիթը, նեոլիթն ու բրոնզե դարը, և ֆեոդալական հասարակություն) նյութական մշակույթի մնացորդներին:

1947 թ. Հայկական ՍՍՀ գիտությունների ակադեմիայի «Տեղեկագրի» № 5-ում լույս է տեսել գիտնականի «Մի քանի գիտողություններ Երևանի Կաթողիկե եկեղեցու արձանագրությունների վերաբերյալ» խորագրով հոդվածը: Հենվելով 1301 թ. արձանագրության վրա և ուրիշ մի շարք ապացույցներ բերելով այլ վիճական արձանագրություններից, հեղինակը համոզիչ կերպով ցույց է տալիս, որ Երևանը XIII դ. դարձել էր միջնադարյան տիպի քաղաք, վարչական կենտրոն, արհեստավորական և առևտրական ձեռնարկություններով: Նա ապացուցում է, որ մինչ այդ Երևանը քաղաքատիպ վայր չէր, այլ գերազանցապես ալդեգործական: Սակայն XIV դ. ձեռագրերի հիշատակարաններում Երևանը հանդես է գալիս արդեն որպես «գյուղաքաղաք» կամ «քաղաք», իսկ պարսկական տիրապետության շրջանի հիշատակարանների մեջ՝ նույնիսկ «մայրաքաղաք» անունով:

XIII դ. երկրորդ կեսից, երբ Հայաստանը սկսում է ապրել համեմատաբար խաղաղ ժամանակաշրջան, Երևանը դառնում է վարչա-քաղաքական կենտրոն, առևտրա-արհեստավորական ձեռնարկություններով և բազմաթիվ «կուղպակներով» (խանութներով): Երևան քաղաքի զարգացման հետ կապ ունի նաև Կաթողիկեի 1264 թ. վիճական կալվածագիր արձանագրության մեջ հանդես եկող անեցի Ավետենց որդի «պարոն Սահմադինը», որը XIII դ. երկրորդ կեսի նոր տիպի կալվածատեր է, առևտրական նոր կուտակվող կապիտալի տիպիկ ներկայացուցիչ, որը կալվածներ է ձեռք բերում դրամի միջոցով: Մրենի 1284, Արուճի 1291, Օշականի 1286, 1288 և 1295 թթ. վիճական արձանագրությունների մեջ Սահմադինը հանդես է գալիս որպես քաղաքային տիպի՝ առևտրով, մանավանդ վաշխառությամբ կուտակած միջոցներով

հարստացած անձ: Սահմադիրը հիշվում է արձանագրությունների մեջ նաև իբրև «բարեգործ», այս կամ այն հարկը վերացնողի դերում:

Հեղինակը Կաթողիկեի մեկ ուրիշ վիժական արձանագրության միջոցով աշխատում է որոշել միջնադարյան Հայաստանի տնտեսական կյանքի ամենակարևոր մի բնագավառի՝ հողի դիրք: Ֆեոդալական ֆեոդալիզմի արտադրության հիմնական միջոցը հողն է: Այդ պատճառով հեղինակը կարևոր է համարում որոշել հողի «իրական-դրամական» դիրք. դա, նրա խոսքերով, կարող է խոշոր լծակ դառնալ Հայաստանի տնտեսական կյանքի միջնադարյան շատ երևույթները հասկանալու համար: Կաթողիկեի այդ արձանագրության մեջ հիշատակված է եկեղեցուն որոշ նպատակով նվիրվող հողի չափը՝ 50 կապիճ: Կապիճ բառը բաղմաթիվ անգամներ հիշատակվում է վիժագրությունների մեջ, բայց որպես ցորենի չափ, հարկերի դանձման կամ զիջման կապակցությամբ: Հիմնվելով մի շարք վիժագրություններում հիշատակված փաստերի վրա, Բարխուդարյանը հաշվարկումներով հաստատում է, որ 1301 թ. ընդունված դրամական միավորով՝ դահեկանով, 50 կապիճի տարածությունը հողամասը արժեր 50 դահեկան:

Բարխուդարյանի ծառայությունները հայագիտության առանձնապես մեծ են վիժական արձանագրությունների հավաքման, նրանց ճշտման և վերծանման ասպարեզում: Անցյալի մեր նյութական մշակույթի հուշարձանները (եկեղեցի, դավիթ, խաչքար, բերդ, գերեզման, կոթող, սահմանային քար և այլն) պատմագիտական մեծ արժեք են ձևեր բերում հայ ժողովրդի դարավոր մշակույթի, նրա ներքին կյանքի պատմության ուսումնասիրության համար աղբյուրագիտական մեծարժեք նշանակություն ունեցող իրենց վիժական արձանագրություններով:

«Հայաստանի կյանքի առավել հետաքրքրական կողմը,— ասում է Հ. Օրբելին,— ժողովրդի կյանքը, ոչ միայն ընտանեկան կենցաղը, կահկարասին, քաղաքային բարեկարգությունը, այլև միջնադարյան հայ քաղաքի հասարակական կառուցվածքը մնում էին միանգամայն անհայտ, քանի որ չէին ուսումնասիրվել վիժագրությունները, հնագիտական հուշարձանների այն առաջին տեսակը, որը պատմագիտական աղբյուրների շարքը մտավ շնորհիվ Մ. Բրոսսեի և Ղևոնդ Արիշանի: Առանց վիժական արձանագրությունների, առանց բաղմաթիվ հարկային ու պարհակային տերմինների, ճանապարհային, մաքսային և այլ տուրքերի անվանումների վերլուծության, անհնար կլիներ դադարաբեկ քաղաքի ֆինանսական կարգի մասին... Վիժական արձանագրությունները երբեմն հնարավորություն են տալիս որոշելու նույնիսկ հարկային և մաքսային վճարումների չափը: Բացառիկ հարուստ նյութ են պարունակում վիժագրությունները նաև մասնավոր-իրավական հարաբերությունների բնութագրման համար. դրանք պայմանագրեր են հողատարածությունների համատեղ օգտագործման, ունեցվածքի բաժանման, կալվածագրերի մասին՝ բոլորը փորագրված վանքերի պատերին»⁴:

ՀՍՍՀ գիտությունների ակադեմիայի հնագիտության և ազգագրության ինստիտուտը նախաձեռնեց հայկական վիժական արձանագրությունների հավաքման և գիտական լիակատար ժողովածուի հրատարակության՝ «Գիվան» (Corpus) ընդհանուր խորագիրը կրող մատենաշարով: Այդ պատասխանա-

⁴ Տե՛ս «Գիվան հայ վիժագրության», 1, Կրկան, 1966, էջ VIII, IX:

տու, համոթություն ու փորձ պահանջող աշխատանքի ղեկավարությունը հանձնարարվեց Սեդրակ Բարխուդարյանին:

Այդ նպատակով կազմակերպված հատուկ գիտարշավների առաջին հինգ տարիների ընթացքում Բարխուդարյանը, լուսանկարիչ Արտաշես Վրույրի աշխատակցությամբ, հավաքեց պատմական Սյունիքի երեք շրջանների՝ Գորիսի, Սիսիանի և Ղափանի վիճական արձանագրությունները, որոնք ամփոփված և հրատարակված են «Դիվան հայ վիճագրության» երկրորդ պրակում (1960 թ.): Այդ հրատարակության առաջին պրակը ամբողջովին նվիրված է ակադեմիկոս Հովսեփ Օրբելու՝ Անիում անցյալում ժողոված վիճական արձանագրություններին, որոնց խմբագրությունը և հրատարակությունը հեղինակը իր մահվանից առաջ վստահել էր Սեդրակ Բարխուդարյանին, ճանաչելով նրան որպես վիճական արձանագրությունների հմուտ վերծանողի: Օրբելին Բարխուդարյանին էր հանձնել խմբագրելու և հրատարակելու նաև Արցախի նշանավոր Գանձասարի վանքի պատմական մեծ նշանակություն ունեցող վիճական արձանագրությունները: Գիտնականը ղրաղված էր այդ վիճագրությունների հրատարակության նախապատրաստությամբ, երբ վրա հասավ անսպասելի մահը (1970):

Բարխուդարյանը խորապես գիտակցում էր, որ վիճական արձանագրությունների հավաքման և հրատարակման գործը բարդ և մեծ ջանքեր պահանջող գիտական կարևոր աշխատանք է: Նա հավաքում էր անխտիր բոլոր վիճագրությունները, մեծ թե փոքր, անդամ կոտրտված արձանագրական ֆրագմենտները՝ սկսած հնագույն ժամանակներից մինչև XVII դարը ներառյալ: Հավաքված արձանագրությունների հրատարակությունը կատարվում էր ըստ վայրի կամ հուշարձանի, խտորեն պահպանելով ժամանակագրական կարգը: Նախ ղրվում էր յուրաքանչյուր վիճական արձանագրության ճշգրիտ գծագիր պատճենը և ապա լուսանկարը՝ իբրև սկզբնաղբյուր: Տվյալ շրջանի վիճագրությունների բնագիրը ներկայացնելիս տրվում են պատմական համառոտ ծանոթագրություններ, իսկ երբեմն էլ՝ ընդարձակ, եթե խոսքը վերաբերում էր գրականության մեջ քիչ հայտնի վայրերի և հուշարձանների: Համապատասխան տեղեկություններ են տրված նաև յուրաքանչյուր արձանագրության տեղի, դիրքի, ներկա վիճակի, վնասվածքների մասին: Դիվանի ամեն մի պրակ օժտված է նաև անհրաժեշտ գիտական ասարատով (անձնանունների, տեղանունների և առարկայական ցանկեր):

Ի մի հավաքելով և ճշգրտելով վիճագրության բնագավառում անցյալից կուտակված նյութերը և շարունակելով գիտական մեթոդով հավաքել, մշակել ու հրատարակել տակավին անհայտ վիճական արձանագրությունները, Բարխուդարյանը ծրագրել էր ընդգրկել Սովետական Հայաստանի և նրան սահմանակից հայաբնակ շրջանների բոլոր արձանագրությունները:

«Դիվանի» երրորդ պրակը լույս տեսավ 1967 թ.: Այն ամբողջովին ընդգրկում է Հայոց Ձորի (Եղեգնաձորի և Աղիղբեկովի շրջանների) հուշարձանների վիճական արձանագրությունները: Հեղինակը Հայոց Ձորի մեծարժեք հուշարձանների և բազմաթիվ վիճագրությունների ղոյությունը համարում է արգասիք ժամանակաշրջանի պատմական համեմատաբար խաղաղ կյանքի, տնտեսական ու մշակութային գործունեության բարձր մակարդակի: Հուշարձանների մի զգալի մասը կառուցված է Բագրատունիների ժամանակ (Գնդեվանք, Ծախացբար, Խոտակերաց և. նշան վանք և ուրիշներ), որոնց վրա պահպանվել են հնագույն

բազմաթիվ վիճադրություններ, մյուս մասը՝ XIII և XIV դարերում (Թանաաթի, Հերհերի վանքեր, բազմապիսի խաչքարեր): Հայոց Ձորի արձանագրություններից շատերը հրատարակված են անցյալում բազմաթիվ թերթիկներում, որոնք պրակում տեղ են գտել համեմատություններից և ճշտումներից հետո միայն: Երրորդ պրակը ընդգրկում է 813 վիճադրական արձանագրություններ, որոնցից 328-ը լույս է տեսնում առաջին անգամ:

«Դիվանի» չորրորդ պրակը, որի բուն տեքստը բաղկացած է 384 էջից, լույս է տեսել 1973 թ.: Այն ընդգրկում է Գեղարքունիքի, Կամոյի, Մարտունու, Վարդենիսի (Բասարղեշարի) շրջանների և Կրասնոսելսկի շրջանի մի քանի գյուղերի վիճական արձանագրությունները: Առաջաբանում տրված է պատմական ծանոթություն Գեղամա երկրի մասին: Ապա առանձին-առանձին հիշատակված են հուշարձանները, որոնցից քաղված են վիճական արձանագրությունները: Այստեղ նշվում են նաև յուրաքանչյուր հուշարձանի կառուցման և նորոգությունների տարիները, ավերածությունները, տրվում է նրանց ճարտարապետական ներքին և արտաքին նկարագրությունը:

Սեղրակ Բարխուդարյանի հրատարակած «Դիվանի» երեք պրակներում վիճական արձանագրությունների ընդհանուր քանակն է 2781, նույնքան է և լուսանկարների թիվը:

Հանգուցյալ գիտնականը հրատարակության էր պատրաստում նաև Լեռնային Ղարաբաղի, Լոռու, Շիրակի և Արագածոտնի հուշարձանների վիճագրությունները, որոնք լույս կընծայվեն «Դիվանի» հաջորդ պրակներում:

ЗАСЛУЖЕННЫЙ АРХЕОЛОГ И ИСТОРИК

(К 75-летию со дня рождения С. Г. Бархударяна)

А. Г. ТУМЯН

(Резюме)

Седрак Георгиевич Бархударян (1898—1970) крупный археолог-эпиграфист и историк. В 1935 г. была опубликована монография ученого «Страна Великухи», где на основании клинописных памятников и других данных показана общность топонимов «Великухи» и «Гелакуни» и дано краткое описание некоторых сторон материальной культуры древнейших обитателей Севанского бассейна.

В области изучения истории развития архитектурной мысли в средневековой Армении особую ценность представляет труд Бархударяна «Средневековые армянские архитекторы и мастера по камню» (1963). В нем выявлено около 70 имен армянских зодчих VI—XVII вв., чьими руками воздвигнуто множество архитектурных памятников.

В 1966 г. было опубликовано исследование С. Бархударяна о правовом положении армянской женщины в средних веках. Но венцом всех его научных работ остается свод армянских эпиграфических надписей. В 1960—1973 гг. вышло четыре тома этого труда, в которых показано важное значение этих надписей как первоисточников для изучения истории армянского народа.